



Reglur um stuðning Ísafjarðarbæjar við frumkvöðla og fyrirtæki sem vilja auka starfsemi sína

1. Markmið

Ísafjarðarbær býður frumkvöðlum og fyrirtækjum sem vilja hefja starfsemi í nýjum atvinnurekstri í sveitarfélaginu tímabundna aðstoð með samningum við bæjarsjóð um endurgreiðslu hluta lóðar- og fasteignagjalda í samræmi við umsvif starfseminnar.

2. Megináherslur

Ísafjarðarbær leggur áherslu á stuðning við verkefni sem tengjast áherslum bæjarins um uppbyggingu atvinnulífs í sveitarfélaginu:

- a) Kynning Ísafjarðarbæjar.
- b) Nýsköpun, frumkvöðlastarf, rannsóknir og þróun.
- c) Útflutningur og þróun nýrra tengsla við erlenda markaði.

3. Styrktarform

- a) Stuðningur Ísafjarðarbæjar er að hámarki til þriggja ára.
- b) Stuðningur bæjarins byggist á samningum sem verða gerðir milli einstakra styrkþega og Ísafjarðarbæjar sem skilgreinir þau sameiginlegu markmið sem stuðningur grundvallast á. Stuðningur miðast við að styrkja verkefni (fyrirtækin) sem nemur lóðar- og fasteignagjöldum. Styrkþegar í leiguhúsnæði fá greitt í samræmi við ofangreind gjöld húseiganda.
- c) Stuðningurinn miðast að hámarki við 100% afslátt af fasteignagjöldum á fyrsta ári, 75% á því næsta og 50% á þriðja ári.
- d) Afsláttur af lóðargjöldum miðast við allt að 50% ef byggt er yfir starfsemina meðan á stuðningstíma stendur.
- e) Þátttaka bæjarins byggir á markmiðum sem fyrirtækin setja sér um vöxt og fjölgun ársverka.
- f) Uppbygging opinberra starfa getur í undantekningatilfellum fallið að verkefnum þegar þau eru afmörkuð og vel skilgreind. Hér er um að ræða rannsóknar- og eftirlitsstörf í sjávarútvegi, landbúnaði og fiskeldi og opinber sérfræðistörf tengd Háskólasetri Vestfjarða og Heilbrigðisstofnun Vestfjarða.

4. Takmarkanir

- a) Ísafjarðarbær styður ekki verkefni sem raska samkeppnisstöðu annarra fyrirtækja á starfssvæðinu.
- b) Ísafjarðarbær styður aðeins eitt sambærilegt verkefni á hverjum tíma, þ.e.a.s. ekki verða styrkt tvö fyrirtæki í innbyrðis samkeppni sbr. grein 4a.
- c) Ef fyrirtæki flytur starfsemi sína úr sveitarfélaginu meðan á stuðningi stendur, endurgreiðir það þann stuðning sem félagið fékk á fyrsta ári samningsins (gert fyrirfram með tryggingarvixli með gildistíma í þrjú ár). Þessi endurgreiðsla er vaxtalaus eingreiðsla með gjalddaga eigi síðar en 60 dögum eftir flutning.
- d) Ef fyrirtæki sem fær stuðning nýtir ekki allt það húsnæði sem það hefur til umráða og hefur tekjur af því rými, m.a. með útleigu, verður styrkurinn hlutfallslega lækkaður samkvæmt þeirri nýtingu.
- e) Verði breytingar á forsendum sem styrkveiting til verkefnis byggir á getur bæjarráð endurskoðað eða afturkallað ógreiddar styrkuppþæðir. Styrkþegi skal tilkynna Ísafjarðarbæ um breytingar á forsendum samnings.
- f) Stuðningur þessi tekur hvorki til verkefna sem snúa að rekstrarerfiðleikum fyrirtækja né heldur verkefna á sviði stóriðnaðar.

5. Umsóknir

Sótt skal um stuðning til Ísafjarðarbæjar á umsóknareyðublaði þar sem fram kemur m.a. nákvæm lýsing á verkefninu og ávinningur af því fyrir bæjarfélagið.

6. Vinnufyrirkomulag

Forgangsröðun verkefna á sviðum sem falla undir verkefnið er ákvörðun bæjarstjórnar á hverjum tíma. Bæjarstjórn skal vera stefnumarkandi aðili og taka ákvarðanir um verkefni sem eru stærri umfangs en fjárheimild fjárhagsáætlunar gerir ráð fyrir. Bæjarráð hefur umsjón með framkvæmd og fjárhagsramma verkefna sem tengjast stuðningi við frumkvöðla og fyrirtæki. Það hefur jafnframt leyfi til túlkunar á einstökum ákvæðum þessara reglna.

7. Upphæðir og framkvæmd

- a) Ekki er skilgreint þak á framlögum til þessa verkefnis. Árlega skal þó gerð áætlun um framlög næsta árs fyrir fjárhagsáætlunargerð.
- b) Bæjarráð hefur umsjón með framkvæmd reglnanna.

8. Útfærsla styrkveitinga

Styrkir verða greiddir tvisvar á ári þegar gögn sem þurfa að hafa borist hafa verið móttekin. Þau eru:

- a) Staðfesting á að viðkomandi sé í skilum við húsráða ef hann er leigutaki.
- b) Greinargerð um stöðu og framvindu verkefnis.

Ef fyrirtæki þarf á samningstímanum að flytja í annað húsnæði í Ísafjarðarbæ, til dæmis að stækka við sig eða kaupa í stað þess að leigja, heldur stuðningur áfram miðað við nýjar aðstæður, en slíkar breytingar eru háðar samþykki bæjarráðs.